

# EPISTOLA<sup>5</sup>

EMINENTISSIMI

CARDINALIS NOALLII

ARCHIEPISCOPI PARISIENSIS,

Ad Illustrissimum Aginnensis  
Ecclesiæ Antistitem.



PARISIIS,

Apud Viduam FRANCISCI MUGERT Regis, &  
Cleri Gallicani, nec non Eminentissimi Cardinalis  
Noallii, primi Typographi.

---

M D C C X I I.





# EPISTOLA

EMINENTISSIMI

CARDINALIS NOALLII

ARCHIEPISCOPI PARISIENSIS,

*Ad Illustrissimum Aginnensis Ecclesie  
Antistitem.*



T si calumniæ quas adversum me jam-  
pridem certi homines in vulgus inge-  
runt, ponderis adhuc nihil apud bonos  
omnes, multò minùs apud te, Præsul  
illustrissime, qui animi mei sensa, vi-  
tæque meæ rationem nosti penitùs, habuerint;  
tamèn operæ pretium fore duxi, si, quo anxiam  
eorum, qui me verè amant, sedarem sollicitudi-  
nem de præsentì negotio, quod omnium sermone  
celebratur, scriberem non-nihil & explanarem; at-  
que ut illud ad te mittam imprimis, jure quodam  
videntur reposcere, cùm mihi multis abhinc an-  
nis insita de te existimatio, tuaque erga me fides  
ac benevolentia singularis; tùm fortis ille animus,  
quo & Episcopalis dignitatis decus, & causæ  
æquitatem meæ tuitus es adversùs eos Antistites,  
qui mihi tam publicè quàm sine causâ insulta-  
runt.

Equidem aliquandiù cogitavi mihi præstabilis

A ij

\* Epist 80.  
ad Eust. Edit.  
Parif. 1638.

esse tantam injuriam silentio pati ; sed me sponte  
mens ferebat mea impulsu exemplo præsertim divi  
Basilii \*, qui errorum insimulatus scripsit ad ami-  
cum quemdam, sibi visum esse omnino silere, mo-  
tosque contra se tumultus animo æquo potius exci-  
pere, quàm ejusmodi adversariis repugnare, qui  
pro justis armis adhiberent calumnias. Ut autem  
splendidum illud Ecclesiæ Lumen ex amicorum postea  
consiliis intellexit proditum iri ab se veritatem,  
nisi calumniatoribus silentium, cum posset, im-  
poneret; ita me quoque facere æquum est ; saltem ut  
omnes resciant, abundè mihi suppetere, undè convicia-  
toribus meis os obtrudatur, illorumque in me doli  
mali, ac fraudulenta consilia in lucem proferantur.

\* Ibidem.

Et sanè quod illi contra me moliantur, nihil  
ferè discrepat ab eo quod olim ab accusatoribus  
suis magnus ille Basilius \* perpeffus est ; qui scitè  
illos dicebat esse similes lupi fabulosi litem agno-  
intendentis ; quandò quidem & illi varias jurgii  
causas & convicia, si minùs prima succederent, aliis  
alia congerebant, usque dùm nacti demùm aliquod  
probabile, possent in prædam suam irruere, cam-  
que sine invidiâ deglutire.

An non iisdem ego nunc propè artibus laceffor ?  
Puderet sanè adversarios meos, si me odisse gratis  
& vexare viderentur : ut igitur odium in me suum  
verisimiliùs exerceant, errores mihi imputant,  
me Jansenistam, aut Jansenistarum fautorem esse  
volunt.

Frustrà iterùm atque iterùm contestor neutram  
in me cadere harumcè criminationum : me sempèr  
ac toto animo quinque Propositiones damnaße :  
nudè ac simpliciter Apostolicis quibuscumque Con-  
stitutionibus subscripsisse, me deniquè tum de facto  
tum de jure esse planè Ecclesiæ obtemperantem.  
Nequicquam intimos hosce meos sensus argu-  
mentis certissimis, & usque recentibus comprobavi.

Quid enim ? emissæ per me est in publicum egregia

demortui Meldensis Antistitis Epistola, quam nondum Episcopus, ad Regii Portus in Campis Sanctimonialibus scripserat: additum est eidem ab ipso me die 15. Aprilis 1709. Mandatum eandem Epistolam confirmans, in quo quæ mea sit de formularii subscriptione sententia, & voluntas, potenter ac dilucidè pronuncio: aliam idem ego scripsi Epistolam die 12. Decemb. 1710. ad quinque Virgines ejusdem Monasterii quæ in suâ pertinaciâ usquè perstabant, quarum duæ tamèn lectis litteris meis ad se reversæ, quod debebant Ecclesiæ obsequium præstiterunt. His accessit novissimum illud meum die 28. Aprilis 1711. Decretum, in quo quæcumque contra Jansenismum ex hac Parisiensi Sede vulgavi, commemoro, ac rursus confirmo. His, inquam, tot & tantis rerum momentis fidei meæ testibus, adversarii non moventur. Expedit illis esse me Jansenistam: quidquid contrà dicam, quidquid contrà moliar: necesse est esse me Jansenistam.

Quâ verò de causâ hanc de me opinionem spargant in vulgus non te fugit Præsul Illustrissime. Nimirum sexdecim & ampliùs ab hinc annis Catalaunensis Episcopus, *Morales* in novum testamentum, ut vocant, *Reflexiones* approbavi; hinc fons, & origo sparsarum ubique de me contumeliarum: atque, ut fere fit jus falsæque abrumpi, ubi quis vel putat, vel videri vult, obsequium se præstare Deo; nihil adversum mihi relictum est; non malignitati cogitationum, non suspicionum injustitiæ parcitum, non temeritati judiciorum; effrænes inde linguæ in me debacchatae sunt, armati in me protervi calami, eò demum non sine maximâ Religionis offensione, venerunt audaciæ, ut apertè me fautorem hæreseos perhibeant, & eum qui in hac Sede Principe famosum illum referam, Eusebium è Nicomediâ, Nestorium Constantinopolitanum aut Photium execrandi illius authorem schismatis, maximique perniciem atque excidium Imperii.

Mihi igitur illud unum incumbit, ut super hac

meâ *Moralium Reflexionum* comprobatione mentem meam aperiâ: quod quamvis jam sæpiùs cum viris ut in sublimi dignitate constitutis, sic virtutum splendore maximè reverendis, tamèn idem facere rursùs, ubi res postulabit, nunquàm abnuam.

Atque utinàm liceret hæc tecum præsentè loquì, quæ multis aliis jam antea sum locutus! Sed quoniam locorum obstant intervalla; hæc, quibus non indiges, scribo non tàm tibi qui me nosti, quàm aliis qui quid sit id negotiù ignorant, quibus velim quid sentiam aperiâs.

His addam quoque quâ veluti rerum serie non sine divinâ Providentiâ fuerim adductus ut paterer ad verticem illius libri, de quo agitur, unâ cum decessoris mei Catalaunensis Episcopi Mandato præfigi alterum à me Mandatum, quod visum est adversariis comprobationis nomine insignire. Brevis erit, etsi paulò altiùs repetatur, narratio.

Divus Paulus laudi sibi ducebat quod probatissimâ inter Judæos sectæ puer adhæsisset, fuissetque ad pedes Gamalielis in Religione eruditus; ita me quoque juvat confiteri à primâ juventute ad Ecclesiasticum statum fuisse à doctissimo Patre *Ame- lote* informatum, quo tùm studiorum moderatore utebar, quique quàm fuerit infensus Janse- nismo, fugit omnino neminem.

Optimi illius sacerdotis consiliâ secutus, divorum Augustini ac Thomæ placita sum amplexus; neque erit unquam, ut tantorum Doctorum & haberi, & esse Discipulus erubescam. Ità factum est ut, ipsâ, quodammodo naturâ duce, Doctrinam Molinæ opinionibus contrariam exfugerem. Novi quæ mens, quive animus debeat esse veri Pastoris & quàm latè patens. Doceri patientèr fero quod Ecclesia censet esse tolerandum; nemini sum idcirco molestus, nemini facefso negotium hoc solo nomine quod Molinista sit. Utor quotidie in regendâ, cujus mihi imposita cura est, maximâ Diœcesi, auxilio virorum

7  
qui dicuntur , & sunt , me probè sciente , Molinistæ ;  
modò ne ista vox sonet operarios in regimine ani-  
marum dissolutos , & morum pravitati indulgentes.

Sed enim quam aliis concedo licentiam , eam-  
dem, ne quid dicam majùs , æquum esset mihi vi-  
cissim dari. Sic certè persuasum habeo intèr cæte-  
ras officii mei partes, debere me pro virili impedire,  
nec ubi Molinismus tanquam Fidei dogma tradatur.  
Meum est Theologorum tueri libertatem: non pa-  
tiar unquàm illis imponi jugum , quod ne ipsa qui-  
dem generalia Concilia imposuerunt. Nulla me res  
unquam divellet à sapientissimâ illius Antiqui sen-  
tentiâ. *In necessariis unitas, in dubiis libertas, in  
omnibus charitas.*

Jam antè præceperam animo , & nimium hacte-  
nùs expertus sum , qualium hominum invidiam in  
me hac ratione concitarem. Suspiciones iniquæ ,  
cæcæ ac subdolæ molitiones , contumeliosæ de-  
nunciationes, & his diebus erumpentes in me odio-  
rum motus , totidem præmia sunt , & fructus studi-  
i illius quo me adversarii sciunt adhærescere veri-  
tati ; neque enim verebor hoc nomine appellare  
quam sequor Doctrinam , quam sancta Sedes ,  
duce Scripturâ , & traditione gravissimè confirma-  
vit , cuique semper favit apertissimè. Verbo dicam ,  
si qui divorum Augustini , & Thomæ Doctrinam  
accuratè , & secundum litteram tenebit , continuo  
Janseuista , fautor-ve dicitur Janseuistarum ; profi-  
teor me, quidquid indè eveniat , illo sensu , quan-  
diù manebit hæc vita , Janseuistam futurum , fau-  
toremve, ut libet, Janseuistarum ; hancque certissi-  
mam mihi spem esse , fore ut aliquandò à Christo  
judicante recipiam illam mercedem , quæ præstò  
est diligentibus veritatem. Sic ferè novatores ,  
dicer aliquis , loquuntur ; seque gloriantur esse  
sanctorum Augustini ac Thomæ Discipulos. At,  
reponit idem Augustinus , non idèd pellem oves de-  
bent suam exuere, quod ovinam induant lupi pellem.

Minimè novum est id quod dico, idem mihi totâ vitâ ut sensus sic sermo fuit; si quid est inter præteritum, & præsens tempus discriminis, indè nascitur, quòd primis illis temporibus nihil erat in me quod quisquam reprehenderet, hodiernis autem, auctores turbarum ambagibus student implicare negotium, ut, quod olim sine suspitione criminis erat, hodiè fiat maximè criminofum.

Citabo testem hujus rei longè locupletissimum Decretum nimirum illud quod nupèr Parisiensis Antistes, anno 1696. promulgavi: quo in Decreto nùm alienam indui personam? nùm obtexi me? nùm vel mitigando levitèr dissimulavi sensus meos? nùm Gratia erubui Evangelium, quod libentèr divi Pauli Evangelium nominarém. Cum enim Evangelistæ quatuor seriem vitæ Christi narraverint inter homines degentis, videtur id sibi sumpsisse magnus gentium Apostolus, ut Gratia Mysterium, & Christi in animabus regnantis imperium explicaret.

Is porrò fuit illius Decreti tum primùm promulgati successus, ut meam omnem longè vicerit expectationem: non solùm Romæ, & in Galliâ frequenti omnium consensu ac plausu exceptum est; sed illæ etiam laudes undècumque consecutæ sunt, quas profectò nunquàm expetivissem. Utinam litteras sedulus asservassem, quæ passim ad me eâ de re scriptæ sunt? à quibus autem scriptæ viris? à viris omni suspitione immunibus, à viris inter præstantissimos Christianæ Religionis tutores insignibus, quorum suffragiis jacerent penitus obruti Censores vel audacissimi. Verùm enimverò non erat ea mens mihi, ut quemquam obruerem. Nec sanè cogitabam eò rem venturam unquàm, ut alienis hisce, atque externis egerem testimoniis ad tuendam Doctrinam ejusmodi, quam semper arbitratus sum, & nunc perindè arbitror, omnium maximè in Ecclesiâ comprobata.



Aliquas tamen ex illis Litteris, ita volente Deo, recuperavi, unam ab Eminentissimo Cardinali *Destrées* mihi scriptam, alteram ab Archipræsule Cameracensi, tertiam à Carnutenſi Episcopo nupèr vitâ functo, aliam à Tullenſi, nunc Meldenſi Præsule, aliam à spectatissimo Sacerdote Tronſonio, qui multos per annos sancti Sulpitii Seminario præsuit, postremam deniquè ab illustrissimo Duce Beauvilliero, cujus singularis pietas, & notissimum omnibus in Jansenismum odium, ipsius testimonio ponderis addunt quamplurimum. Illarum tibi Litterarum exempla mitto quæ, ut arbitror, non sine voluptate leges, quæ cum legeris, vix ac ne vix quidempoteris intelligere, quâ fieri potuerit ut Decretum illud tantòpere probatum, tot celebratum laudibus ausi sint quidam *Fidei Jansenistarum* nominare *Professionem*. Disces quoquè inde vivere etiamnum apud nos homines qui temporum Fidem habeant, non Ecclesiæ, quæ nunquam mutatur, juxta illud Tertulliani. *Regula Fidei una omnino est, cui nemo præscribere potest, non spatium temporum, non patrocinia, non privilegia Regionum.*

Probl. vul.  
gar. an. 1693.

Tertull. lib.  
de veland.  
virginib. c. 14

Redeo nunc ad inceptam de Libro illo narrationem, cujus occasione tot hodiè procellæ in Ecclesiâ concitantur. Versabatur ille jam tùm in omnium manibus, cùm Diœcesi Catalaunenſi sum Præfectus. Anni effluerunt, ut tenes, jam triginta: illustrissimus Antistes D. Vialart cujus etiamnum memoria apud Catalaunenses in benedictione est, illius Libri editionem primam approbat, eandemque cunctis gregis sui Pastoribus distribui curaverat. Anniadverti ego Pastores ex illius lectione, nedùm quidquam detrimenti, plurimum contrà cepisse utilitatis: nam illius ope Libri multò commodius cùm parvulis & simplicibus, tùm doctioribus & sublimioris ingenii viris Evangelia explanabant, cùm interim nulla apud eos curiositas, nulla de

Gratiæ materiâ contentio, nulla, ne levissima quidem, ad pravam doctrinam inclinatio animorum. Quæ cum irâ se habere per annos plurimos essem expertus, haud abs re fore credidi, si Mandato in eam rem dato, declararem nihil ob stare me, quominus eodem, ut antea, Libro uterentur.

Jam verò quo tempore mandatum hoc edidi, Doctorum multorum erat iste liber autoritate, ac probatione fretus, talemque apud omnes ubique commendationem habuerat, ut cum fuisset jam typis mandatus sæpè, exhaurirentur officinæ Librariorum, atque ipse Decessor meus Parisiensis Archipræsul illustrissimus Harlæus, cujus insignis sagacitas, & acerrimus in Jansenismum usque vigilabat animus, Librum istum edi, vñire, distribui Parisiis, & in totâ suâ latè Diœcesi, pateretur.

Quin & multi Præsules illustrissimi non pietatè minùs, & singulari, in mentibus ad bonos mores informandis, studio, quàm manifesto in novatores odio commendabiles, quorum nonnulli sic cursum hujusce vitæ brevis exegerunt, ut moriendo Sanctitatis famam reliquerint, ad id me vehementer hortati sunt, ut illud opus quantâ possem autoritate fulcirem, quod paritèr idoneum rebantur, & plebi ad pietatem comparandam properanti, & Pastoribus saluti invigilantibus populorum.

Ac nominatim vir pietate conspicuus D. *Durfé* Lemovicensis Episcopus à me postulavit, uti ab auctore impetrarem, ut ex toto opere, quæ in Epistolas anni totius, & Evangelia commentatus erat, exciperet, & quam in novi, eandem in veteris testamenti Epistolarum commentatione poneret operam, quo hæc omnia in exiguum contracta volumen, faciliùs & minori pretio emerent egeri, & in agris degentes Parochi ad habendam familiarem apud populum singulis dominicis Concionem. Cum scribebat ad me D. *Durfé* putabat

authorem esse mihi notissimum, nosque inter Licentiarum intercedere, aut amicitiae societatem, quaes illum fallebat; nulla enim cum illo tùm fuerat mihi necessitudo, nequè ulla deinde usquàm fuit.

Non dubitavi quin ejusmodi postulationis fautores essent Sulpiciani Seminarii moderatores, quorum consiliis pius ille Præsul, cum illis unicè consideret, in omnibus urebatur. Lege. & ejusdem, eâ de re, quam ad te mitto Epistolam, in quâ cum tam apertè *Reflexionum* Librum comprobet, nunquid vereberis ne & ipse apud certos homines Jansenismi fautor habeatur? ô utinâm esset in Ecclesiâ Gallicanâ magna Præsulum multitudo, qui tam sanctum Antistitem, & Fidei integritate, & ardore charitatis effusissimo referrent?

Statim atque, Deo volente, commissâ mihi fuit Ecclesia Parisiensis, novæ illius libri editioni incumbere statuerunt Librarii. Cùm verò mihi ipsi per tempus, & negotia non liceret verba singula & sententias, ad Sanctuarii veluti lancem, ponderare, duxi adeò esse mei in sanam doctrinam propensissimi studii, ac prudentiæ, librum illum eruditissimis quibusque Theologis, accuratiùs, si fieri posset, & rursus, excutiendum committere; quod cum singulari curâ, singularique diligentia perfecissent, renunciarunt, propositiones *quinque Propositionibus* contradictorias in eo deprehendi, quas ego unâ cum illis reverâ recognovi, atque ut clariùs innotescerent lectoribus; quibus in locis jacerent, in materiarum indice notatum est.

Quidquid à quibusvis hac de re delatum ad me est, perlibenter accepi; quin & eorum qui animo erant minùs æquo judiciis indulgens, corrigi omnia volui, quæ mihi planum fuit debere mutari.

Bossuetius Meldensis Episcopus in partem hujusce examinis venire non abnuir: illudque tùm opus confecit quod nupèr editum in lucem est, in quo quid de illo libro sentiret, palàm omnibus est;

*Justificat.  
des Reflex.*

nec quisquam suspicari meritò possit tantum, & tam abundanti Doctrinâ virum, acerrimum insuper veræ fidei propugnatorem, aut non deprehendisse, aut dissimulasse errores, quibus librum illum scaterere ubique contendunt. At si illustrissimum æquè ac doctissimum Præsulem fugit quis libri sensus esset, si ego & ille perperam, & malè de illis propositionibus, quæ vituperantur hodiè, judicavimus, & accepimus eas juxta sanctorum Augustini & Thomæ principia; at sanè absque errandi formidine contendimus, verissima esse illa Theologiæ Dogmata quæ magnus ille Gallicanæ Doctor Ecclesiæ stabilivit in illo scripto, quo Librum *Reflexionum Moralium* ab errore probavit immunem, quando eadem prorsus illa sunt, quæ summi Pontifices præ cæteris sunt secuti in materiâ Prædestinationis & Gratiæ, cum in Congregationibus de *Auxiliis* super eâ re disputatum est.

Ad scribendum autem Meldensem Episcopum maximè impulit Problema nefarium, quod non sine omnium offensione in lucem anno 1698. prodiiit: istius Libelli Author *Reflexiones* in novum Testamentum omnibus Episcopis denunciabat; atque inde Propositiones exscripserat plurimas, in quibus totum Jansenismi venenum contineri volebat. Meministi quæ fors istius libelli fuerit, Parisiis ex Senatus consulto flammâ vindice crematus, Romæ à summo Pontifice Innocentio XII. damnatus est, quæ censura, saltè indirecta quædam, & tacita comprobatio visa fuit *Reflexionum* quas Problema culpabat; & sanè, inquiebant, damnare Romæ Libellum ad id planè conflatum, ut denunciarentur impugnarenturque *Reflexiones*, quid aliud videri potest, quàm earundem non obscura comprobatio.

Cæterùm operæ pretium est attendere, opus hoc non esse Dogmaticum, in quo verba sint scrupulosius expendenda, ac veluti trutinanda, sed opus ad mo-

res, & pietatem pertinens, ubi quæ sub stilum cadunt, minori cautione ac penè negligentius admittuntur. Sic & sancti Patres cum iisdem de rebus agerent, minùs in verborum delectu laborarunt; quin etiam quotidie videmus ab hominibus qui à Jansenismo longè abhorrent, libros ad excitandam pietatem compositos Fidelibus tradi, in quibus occurrunt multæ voces; quas in jus nemo vocat, quæ tamèn, si summo jure expendantur, non censurâ dignæ minùs fuerint, quàm quæ hodiè tam acriter exagitantur.

Undè qui Librum, pendendo singula, perlegerunt Censores, existimarunt, si quæ in illo Propositiones inessent minùs accuratæ, eas esse condonandas; cum faciliè possent ad verum bonumque sensum revocari; & certè res tamdiù ita fuit, nemine culpante, quamdiù Mandatum meum, aut si ita volunt, approbatio mea non accessit.

Quod pertinet ad illa quæ seditiosa nuncupantur, quæ tamèn reverâ non sunt ejusmodi, nisi quatenùs pro arbitrio reprehendentium adaptantur; multa ego reperi in eo Libro ad stabiliendam Regum auctoritatem ad imperandum subjectis Populis in Reges suos obsequium tam potentia, tam efficacia, ut faciliè crediderim cætera, quæ occurrere poterant, non tam ipsam laceßere auctoritatem, quàm vituperare auctoritatis abusum: præterea cum illa loca ecclesiasticas potestates magis, quàm sæculares spectare videantur, putavi utile nobis, Evangelicisque Pastoribus capiendum indè documentum, ut commissam nobis Provinciam ad exemplum normamque Christi disceremus administrare, hoc est cum singulari mansuetudine, & cordis humilitate, non cum imperio, ac superbâ quâdam dominatione, juxta illud Filii Dei ad Apostolos: *\* Reges Gentium dominantur eorum . . . . vos autèm non sic.*

\* Luc. 22.  
25, & 26,

Ad hæc quodquæ subjiciam cum perstiti in concedendâ legendi Libri hujus licentiâ, non in animo

fuisse mihi, illum tanquam factum proprium adoptare, meosque facere omnes sensus in quos distrahi potuisset; nemo nescit magnum esse delictum operis inter alicujus auctorem, ejusdemque probatorem; quod & si ipse confecissem, libenter Augustini secutus exemplum, refellerem si quid inesset vituperatione dignum, penitusque relecarem. Nec me præterit quod Spiritus Sanctus de multiloquio protulit, & quam difficile sit in opus longum, ubi tam varia rerum argumenta, non subrepere sensim sine sensu menda quædam ac nœvos, illius maximè generis in quod sollicitè admodum, & censurâ severissimâ cum summâ inveniendi cupiditate inquiritur. Intelligo etiam quàm laudabile sit abjicere se, & mentem deprimere ad conspectum veritatis.

Verùm mihi cum plurimùm micare luminis in illo Libro, passimque occurrere sanctorum Patrum viderentur sententiæ graves, quæ possent Fidem alere fidelium, & acuire pietatem, nolui Catalaunensem populum eo, quem jam ante ceperat, fructu privari. Contendere autem, quemadmodum quidam ausi sunt, nihil in illo opere sanum esse, corrupta omnia medullitùs, absurdum sanè, & stultissimum ausim ego asserere, atque eos qui sic loquantur, aut nunquàm legisse librum, aut eorum animos in partem contrariam præfractè & turpiter esse præversos. Quod porro prodigium illud est! Volunt Librum illum lethifero hæreseos veneno refertissimùm, immò perniciosissimùm omnium quos unquam parturierit hæresis; & per annos triginta non Sacerdotes, non Doctores, nec Laïci, nec Religiosi viri, non Episcopi, non Cardinales, non amici, non inimici, nemo omnium sensit, nemo odoratus est; de pestifero calice Babylonis biberunt omnes, atque omnes incogitantes, inscii, veneno sunt inebriati.

Vides, cujusmodi criminis hodiè coarguar,

nempè Librum probavi quo tempore laudabatur ab omnibus, tempore quieto & pacifico, cum si quâ in re sensus aliquis dubius ac malus inesse poterat, in bonum invertebatur, nedùm bonus detorqueretur in pravam. Damno, inquam, ex animo, ut jam ante damnavi, malos sensus omnes quos istis *Reflexionibus* affingi placet, maximè illos qui renovare videantur, aut juvare hæreses proscriptas in famosis illis quinque propositionibus è Janſenii libro extractis. Ac testem Deum appello me nunquàm aliter quàm in sensu Gratiae efficaci, & gratuita Prædestinationis *Reflexiones* easdem esse interpretatum, hoc est juxta veram sanctorum Augustini & Thomæ sententiam, qualem ego jam exposui anno 1696. non qualem falsò tribuunt Janſenistæ sanctissimis his Doctoribus, quorum scripta, ut dixi, doctrinamque venerabor æternùm, non ita tamèn, ut interdiciam ne scholarum aliarum Theologi sectentur opiniones ab Ecclesiâ non prohibitas.

Ubi has conſlari turbas & contentiones animadverti, si meo paruiſſem ingenio, placebat edicto palam proposito hortari omnes, ut si quid qui in librum istum animadvertissent, illud omne mihi credere ne gravarentur; illorum ope & diligentia adjutus, sic mutassem, sic emendassem quidquid pravis fuisset obnoxium sensibus, nihil ut in censuram incurriſſet eorum quicumque certam in judicando regulam adhiberent, quique apprimè certò designarent quas damnandas esse propositiones judicarent.

Quâ in re divi Hieronymi præscriptum aut normam eſſem secutus, quâ vult in Librorum Lectione.

*\* Ut bona eorum eligamus, vitemusque contraria.*

pravitate ducuntur, videntur mihi illi, maledictio Prophetico subjacere: *Vae his qui dicunt bonum malum, & malum bonum, qui faciunt amarum dulce, & dulce amarum. Isa. 5. 20.*

Nec enim propter doctrinam ejus, prava suscipienda sunt dogmata, nec propter, dogmatum pravitatem, si quos commentarios in Scripturas sanctas utiles edidit, penitus respuendi sunt. *Hieron. Epist. 56. ad Tranquillinum.*

\* Quia parvitas meæ sententiam quæris, utrum secundum fratrem Fausſinum penitus respuendus sit, an secundum quosdam legendus ex parte; Ego Origenem propter eruditionem, sic interdum legendum arbitror. Quomodo Tertullianum, Novatum, Arnobium, Apollinarium & nonnullos Ecclesiasticos scriptores Græcos pariter & Latinos. Ut bona eligamus, vitemusque contraria, juxta Apostolum dicentem, *omnia probate, quod bonum est tenete.*

*1. Thes. 5. 21.* Cæterum qui vel in amorem ejus nimium, vel in odium stomachi sui

At nolo mihi uni credere arrogantius: sponte fateor, modò facta testis sit veritas, atque integra ministerii mei Religio, quas vel vitæ dispendio mihi tuendas arbitror, debere me legitimæ auctoritati subiacere, atque omnes effusâ sine modo charitate complecti.

Qua propter palàm ego dixi, & coràm quibuscumque, me nunquàm aut turbaturum, aut turbari & dividi passurum Ecclesiam studio tuendi Librum quo possit carere Religio: meque si summus Pontifex æquum duxerit Librum hunc consueto more proscribere, ejus Constitutionem, & Censuram cum summâ veneratione excepturum, atque intèr primos verè perfectique exemplum obsequii ex corde & animo præstiturum. Et sanè gratissimum mihi accideret, maximoque honori ducerem à Sanctissimo Pontifice doceri me, cùm cætera, tùm præcipuè quæ sit ratio tutissima de rebus tam subtilibus, tam reconditis, tamque gravibus emendatè disputandi.

Quæ me nunc decorat, Sedique Apostolicæ conjungit arctissimè Romana purpura, pro suo jure reposcit, id usquè ut sentiam; quamquàm non illa mihi hos reverentiæ sensus attulit, jam antè Purpuram erat mihi insita naturâ, & multis in merationibus consolidata propensio: nunquàm non fui cunctis Constitutionibus Apostolicis obsequentissimus: & quidquid ubicumque in me fuit auctoritatis, illud omne in id contuli, ut iisdem omninò ab omnibus obtemperaretur. Aversatus usquè sum, & averfor etiamnum omnes in materiâ Fidei novitates; nullam non infector; & vehementissimum illud studium, quo flagrare per totum vitæ cursum in Jansenismi errores cupio, non tamèn restinguet ardorem quo me decet inflammari adversus perverfas cujuslibet generis opiniones.

Hæc quæ nunc tecum privatim, si per vicos, & compita, & quod aiunt, supra testam prædicem, metuo tamèn, ne non sim fidem facturum iis omnibus,



bus, qui in cæteris fortasse nimium remissi, in hac unâ re acerrimi, visi sunt hætenus in iis cæcutire quæ strenuè peracta sunt à me ad exterminandas novitates: nam, non mentiar, accidit nunc mihi quid ei simile quod olim in deserto Syriæ D. Hieronymo querenti se ab adversariis exagitari indignis modis super vocabulo Hypostasos. *Si per illud vocabulum*, inquebat, *personam intelligunt, tres esse in Deo indefessâ voce pronuncio, si Substantiam interpretantur, unicam in Deo, unamque Divinitatem affirmo; sic quamlibet in partem res agatur, Hæreticus esse nequeo; nusquam illis à me tamen potest fieri satis, quotidie exposcor fidem, quasi sine Fide renatus sim; Confiteor, ut volunt, non placet, subscribo, non credunt; unum tamen placet ut hinc recedam.*

Tandem vir sanctissimus Eremo cessit tanto turbine tempestatis abreptus: at illa vincula quibus impeditus Eremo adhærebat, longè discrepabant ab illis vinculis quæ potenti manu divina Providentia mihi connexuit, quibusque me cum creditâ mihi plebe arctissimè constrinxit: vel, ut verius loquar, idè reliquit Eremum, quia nulla eum Eremo lex addicebat. Novit Deus, cui perspecta funditus animi mei arcanâ sunt, si impositum meis jam nimium diù humeris onus liceret deponere, rem mihi longè multò quàm cuiquam hominum fore gratiorem, meque incredibili perfusum iri lætitiâ, si demissâ de aliorum salute curâ, meâ unototus possem saluti invigilare. Verùm ex illis causis, quibus per Concilia fas est Episcopo susceptam semel abdicare Provinciam, scrutanti nulla occurrat quæ me spectet; non enim inter legitimas secedendi causas video recenferi, nec difficultatem temporum, nec amorem quietis, non animum sine fide renatus sim. Confiteor ut volunt, non placet. Subscribo, non credunt; unum tamen placet, ut hinc recedam jam jam cedo. *Epist. 15. ad Marcum Presbyter.*

**Hæreticus**  
voco *Homousion* prædicans Trinitatem. Sabelianæ impietatis arguor, tres subsistentes, veras, integras, perfectasque personas indefessâ voce pronuncians. Si ab Arianis, merito. Si ab Orthodoxis, quæ huiusmodi arguunt fidem, Orthodoxi esse desierunt. Aut si eis placet, hæreticum me cum Occidente, hæreticum cum Ægypto, hoc est cum Damaso, Petroque condemnent.... non mihi conceditur unus angulus Eremi. Quotidie exposcor fidem, quasi

aut abhorrentem à tolerandis incommodis, aut metuentem certamina contrà injustitiam subire, aut in veritate, propriâque innocentia defendendâ remissiozem: quin imò passim ubique incitantur Ecclesiæ Gubernatores, uti dum sævit tempestas à Gubernaculo ne tantillum recedant.

Cæterum constat non esse undè metuam ne Clerus Populusvè Parisiensis adedò sit alienus à me, eos ut cogar deferere: nam cum antea multa publicaque dederunt studii in me sui obsequiivè testimonia, tum verò hoc tempore longè plura clarioaque, ex quo D. D. Lucionensis ac Rupellensis Episcoporum manavit in vulgus Epistola; quæ (dicam enim quod sentio) visa est nihil aliud attulisse, quàm ut ex eâ ovium fides in Pastorem, si fieri posset, accresceret. Quàmobrem si divus Paulus dum queritur sibi minus à Corinthiis in amore responderi, affirmat tamèn esse paratum se ut omnia impendat, & supèr impendatur ipse pro eorum animabus, næ ego iniquus admodum sim, si otium meum saluti anteponam ejus Populi, quem novus in me amor, & intimus pietatis affectus multò mihi chariorem debet efficere, quique cum meum nunc singulare gaudium sit atque solatium, futurus est, miserante Deo, corona & gloria mea coràm Domino Jesu-Christo in die supremi Adventus.

Calumniantur me certi homines Doctrinæ causâ. Scis ipse certissimè omnium, Præsul Illustrissimè, meum hoc crimen, præstantissimorum cum virtute tum scientiâ virorum, quibuscum minimè sum conferendus, commune crimen extitisse; sic vexati olim Athanasii sunt, sic Basilii, Chrysostomi, Gregorii Nazianzeni, Hieronymi, ipse Joannes dilectissimus Magistro Discipulus plenus Gratiâ & Sanctitate vir, ipse, inquam, docet nos, verbis malignis garriisse in se malevolos. Meus autèm in hoc torus dolor est, quod ab illorum Christianæ Reli-

gionis Heroum virtutibus absim quàm longissimè.  
 Tuum est , optime vir , qui me , quod minimè du-  
 bium est , amas ex animo , tuum est à Christo Do-  
 mino sollicitâ prece flagitare , ut , quandò me ali-  
 quantulùm earumdem molestiarum participem esse  
 vult , plurimùm etiam in me conferat illius Gra-  
 tiæ , & fortitudinis , quibus Sanctissimi illi homines  
 abundabant ; Det insupèr Deus immortalis , ut in  
 ejus lumine perpetuò ambulem , ejus Spiritu regar  
 assiduè , noverimque in omni re quid dicendum ,  
 quid tacendum , quid contemnendum , quidve me-  
 tuendum , quid omittendum , quid exequendum ;  
 ut deniquè inter hæc turbulentissimas perturba-  
 tiones rerum in Fide constanti , conscientiâ purâ ,  
 vitæ ratione prudenti , ejusque maximè congruâ  
 voluntati , æternùm perseverem. Valè Præsul illu-  
 strissime , & charissime ; Parisiis die vigesimâ  
 Decembris. Anno reparatæ Salutis humanæ mil-  
 lesimo septingentesimo undecimo.

† L. A. CARD. NOALLIUS.



**MANDATUM**



# MANDATUM

EMINENTISSIMI

CARDINALIS NOALLII

ARCHIEPISCOPI PARISIENSIS

*Quo legi prohibentur scripta quaedam in lucem edita sub titulis Pastoralium institutionum & Mandatorum, D. D. Episcopis Lucionensi & Rupellensi, necnon D. Episcopo Vapincensi, attributorum.*



UDOVICUS-ANTONIUS NOALLIUS, Divinâ permissione Cardinalis, Presbyter sanctæ Ecclesiæ Romanæ, titulo beatæ Mariæ ad Minervam, Archiepiscopus Parisiensis, Dux sancti Clodoaldi, Franciæ Par, Ordinis Sancti-Spiritûs Commendator, Sorbonæ Provisor, & Regiæ Navarræ Superior: omnibus nostræ Diœcesis Fidelibus, Salutem, & Benedictionem.

Plurimi Rectores Ecclesiarum Paræcialium, multique Communitatum præfecti ex hac urbe principe, ad nos detulerunt, non sine intimo quodam sensu doloris animadvertere se, spargi non ita pridem per totam hanc latè Diœcesim, ingentem scriptorum multitudinem, quorum alia sine Authorum aut Typographorum nominibus, alia sub titulis præceptionum, & Mandatorum Episcopaliûm, in quibus multi continentur errores, & fidei,

C

& morum Christianorum integritati repugnantes.

Id verò malum videri sibi hōc periculosius, quòd si nihil adversus ista mandata, ubique ad valvas publicè affixa, Episcopali insuper autoritate in speciem munita, statuamus; ex silentio nostro Fideles collecturi sint, per nos licere sibi, comprehensam in illis pravam doctrinam sequi.

Et quidē Mandatum sub speciosis D. D. Lucionensis & Rupellensis Præsulum nominibus editum, dū traditos à Jansenio molitur errores convellere, è quinque Propositionibus favere tertiæ, ac renovare vicesimam sextam, & vicesimam octavam Propositiones in Baïo à summis Pontificibus Pio V. Gregorio XIII. & Urbano VIII. damnatas.

26. Omnia opera infidelium sunt peccata.

28. Liberrimum arbitrium sine gratiæ Dei adjutorio non nisi ad peccandum valet.

Mandatum autem D. Episcopo Vapincensi adscriptum, esse ejusmodi ut ne dū in Ecclesiasticorum animis debitam excitet venerationem erga divi Augustini de Gratiâ Doctrinam, cujus verba, & sententias Ecclesia in suis Conciliis usurpavit ad conscribenda Fidei documenta super eâ materiâ; tanto contrà contemptu de præstantissimo illo Doctore loquatur, ut velle videatur. fideles ab ejus operum lectione, tanquàm à perniciosâ Doctrinâ, detertere.

Quamquam vero paucis admodum abhinc diebus Mandatum istud in publicum prodierit; tamen, quod in eo plurimæ morum regulæ, divi Caroli institutionibus, & Tridentinæ Synodi Decretis planè congruæ improbantur, laxioris de moribus Doctrinæ fautores jam tantum ex eo virium animorumque recepisse, ut vel hæc sola ratio debeat eos omnes impellere quibus est cordi salus animarum, ut ad nostram auctoritatem, super interdiciendâ talis mandati lectione, confugiant.

Quod si longius ejusmodi sanctissimarum legum abrogationes serperent in vulgus, futurum brevi, ut & qui peccant ex inveteratâ consuetudine, putent se sine ullâ probatione, absolvi debere à pec-

cat; & scelera quæque, legi naturali ex toto contraria, invincibilis ignorantiae prætextu exeusentur; & indurati, quod æquo Dei judicio possunt interdum relinqui sibi ipsis, contendant se posse pravis corruptæ mentis suæ affectibus impunè obsequi; denique Propositiones omnes quas tantâ cum æquitate summi Pontifices, & Clerus Gallicanus in Comitibus Generalibus anno 1700. proscripserunt, à defensoribus corruptæ de moribus Doctrinæ, protinùs iri renovatum.

Inde ad eò studiosissimi illi suarum ovium Pastores, conterriti periculo, ad quod sibi commissi Fideles, propositâ tam perversarum opinionum dulcedine, adducuntur, nostram opem hòc majore cum fiduciâ implorant, quod cum auctoritatem nobis quantumvis indignis, à Spiritu-Sancto creditam ad regimen hujus Ecclesiæ, reverentur: tùm probè sciunt, nullam in hacce Diœcesim, novam Doctrinam, conatam esse irrepere, quin protinùs illam sine ullâ personarum acceptione, debellaverimus.

Anno quidem 1696. Censuras adversus errores Jansenii à nobis renovatas, quo simul Decreto, traditam à sanctis Patribus de Gratiâ & Prædestinatione disciplinam docuimus.

Anno 1697. Institutione nostrâ Pastoralis de Spiritualitate, Quietismi errores fuisse confixos, deliramenta dissipata.

Anno 1700. Censuram à Clero Gallicano latam in Comitibus generalibus contra solutiorem Doctrinam de moribus, cui omnium primi subscripsimus, à nobis pariter omnium primis fuisse in hacce Diœcesi promulgatam.

Anno 1703. Nostrum de condemnando conscientie casu Decretum, cæteris aliorum hujus Regni Antistitum Decretis prævisse: quâ in re nobis id laudi datum est, & fuit solatio longe gratissimo, quod sancta Sedes Apostolica Decretum idem per capita singula confirmavit.

Item, anno 1706. Theologicas P. Juenini institutiones, ubi primum ad nos delatæ sunt, à nobis continuò fuisse condemnatas.

Ex illo denique tempore non desisse nos, iteratis Pastoralibus Epistolis ac Mandatis exhortari, urgere, condemnare, si qui visi sunt Ecclesiæ debitum obsequium non præstare, imprimis Regiiportûs in Campis Moniales, apud quas à nobis scripta mense Decembri proxime elapso Epistola tantum valuit, ut ex reliquis quæ erant exiguæ admodum numero, duæ perfectâ Epistolâ, summorum Pontificum Constitutionibus obtemperaverint.

Tot ac tantis rerum momentis impulsivi vigilantissimi Pastores, asserunt sperare se, nos non diutius passuros teri Fidelium manibus libros, quibus errores in Baïo Jansenioque proscripti confirmantur, quique cum meras opiniones in Theologiam modò permissas, tanquam fidei dogmata stabiliunt: tum pro hæreticâ repudiant Doctrinam in Scholis receptam communiter, & à Catholicis Doctoribus longè multis, propugnatam, quibus denique libris, nimis severitatis, falsitatis, temeritatis, scandali, erroris, & vigentis hoc tempore Rigoris, insimulantur sapientissimæ regulæ, quas Clerus Gallicanus Divum Carolum secutus, in administrando ritè Pœnitentiæ Sacramento præscripsit à Confessoribus observari.

HIS DE CAUSIS, habitâ ratione querelarum delatarum à tot Pastoribus, torque viris aliis, quos & scientia sua, & pietas, & ardens in omnes novitates studium commendat, excussimus per nos ipsi, atque à plurimis Theologicæ Facultatis Parisiensis Doctoribus diligentèr expendi curavimus accusatas apud nos Propositiones, varique scripta, unde illæ desumptæ sunt. Postea consultis non paucis Præsulibus, imploratoque Præpotentis Dei, qui luminum est Pater, auxilio, ad elevandam animarum offensionem, in nostrâ



jam latè Diœcesi per ejusmodi scripta concitatam, nefas esse duximus, in tanti momenti negotiis servare silentium.

Incumbit autèm nobis hœc major in ejusmodi scripta insurgendi necessitas, quod ex solâ illorum lectione persuasum habuimus, non potuisse illos Antistites quorum nomina præferunt, partus edere tam vitiosos, quos si tantis Præsulibus affingamus, facturos illis esse nos injuriam arbitremur: Videamur de illorum fide dubitare, ac suspicari illos gerere se Patronos doctrinæ planè adversantis Decisionibus Ecclesiæ, imprimis censuræ anno 1709. solemniter factæ in Comitibus Cleri Gallicani, cui nos æquum est opinari, ab ipsis reverentiam quam debent, exhiberi.

Malè præterea de illorum sapientiâ sentiamus, illos si dùm commisso sibi gregi totos invigilare necesse est, credamus curas, & cogitationes extendisse in Parisiensem quoque Diœcesim, cujus onus non fuit ipsis à Deo demandatum, cuique siquid est opus, ne possunt quidèm, præ locorum distantiam, cognoscere.

Multarum denique rerum aliarum confcios eodem judicemus; evertisse nimirum leges quas habet ecclesiastica disciplina constantissimas, oblitos esse omninò decoris officiorumque quibus civilis vita continetur, & Communionem Episcopalem diremissæ; si veniat nobis in mentem, illorum jussu affixa ubique Lutetiæ per compita, ac per privatas domos distributa, nobis insciis, Mandata & Pastorales Institutiones in gratiam ejus Populi, cui sanè pabuli nihil debent: maximè cum tot publica nos hæctenus nostri in confutandis quibusque novitatibus studii, dederimus argumenta.

Abstineat igitur ut ullis è Clero Gallicano Episcopis consilia scriptaque, ab illorum dignitate tantòpere abhorrentia, tribuantur. Apparet luce clariùs fraudem subesse hominum Episcopatu infestorum

qui ausi sunt Præfulum abuti nominibus, ut illos à se ipsis sejungerent, eoque facilius Ecclesiæ Doctrinam succuterent.

\* Sanctus Augustinus, cujus doctrinam secundum prædecessorum meorum statuta, Romana sequitur & servat Ecclesia. *Joan. I I. Epist. 3. ad Sen.*

Dicam rationes propter quas adstringere statui totam hanc disputationem ad normam doctrinæ sancti Augustini de gratiâ. Prima est, quod si teste beato Prospero viginti annorum spatio acies Catholicæ Ecclesiæ ita dimicavit pro gratiâ contra Pelagianos, ut tandem Augustino duce vicerit, oportet etiam ut in causâ consimili eundem ducem agnos-

Inurat certè maximam universo Clero Gallicano injuriam, qui suspicetur, in Galliâ vel unum extitisse Antistitem, qui magni Augustini Doctrinam contemneret, \* quam summi Pontifices adoptarunt, judicemque, & arbitram in controversiis de Prædestinatione, & Gratiâ adhibuerunt.

Speramus fore propè diem, ut Clero utrique nostro, sæculari, & regulari proponamus Pastoralis institutionem ad obtinenda pravarum opinionum vestigia, si qua fortè tot libelli per hanc Diocesim tantâ cum licentiâ disseminati, potuerint Fidelium animis infigere.

Interim, ut malo nascenti, ne desit aliquod impræsentia remedium, constitutâ juris pænâ. V E T A M U S omnes nostræ Diocesis Fideles legere, vel servare domi scripta in publicum evulgata sub prætenso titulo præceptionum, & Pastoralium Institutionum D. D. Lucionensi & Rupellensi Episcopis attributarum, necnon Mandati editi sub nomine D. Vapincensis Episcopi. Mandamus, ac præcipimus omnibus Paræcialium ecclesiarum Rectoribus, nobis subditis, ut inter Missarum solemnias nostrum hoc Mandatum publicè legant: Item Præfectis omnium Communitatum, sæcularium, & regularium, seu se ferant, seu non ferant immunes, ut illud idem frequenti Conventu legendum curent; quâ de re Promotorem nostrum faciant intrâ spatium mensis unius, certiozem. D A T U M Parisiis in Archiepiscopali nostro Palatio, die vigesimâ octavâ

camus & sequamur. Secunda est, quod idem Sanctus nihil videtur prætermisisse eorum quæ ad præsen-tes controversias pertinent. Tertia tandem ratio est, quod cum multi Pontifices & prædecessores nostri hæreditario jure eam in Ecclesiâ relinqui voluerint, æquum non est ut patiar illam hac hæreditate privari. *Clem. V I I I.*

*Alex. V I I.* Præclarissimorum Ecclesiæ Doctorum Augustini & Thomæ Aquinatis inconcussa tutissimaque dogmata.

Aprilis anno millesimo septingentesimo undecimo.  
Signatum, LUDOVICUS ANTONIUS  
CARD. NOALLIUS, ARCH. PARIS.  
*Inferius*, per Eminentissimum Cardinalem,

CHEVALIER.



